

Na osnovu člana 19. stav 1. Zakona o Vladi Federacije Bosne i Hercegovine („Službene novine Federacije BiH“, br. 1/94, 8/95, 58/02, 19/03, 2/06 i 8/06) i člana 18. Zakona o finansijskoj konsolidaciji privrednih društava u Federaciji Bosne i Hercegovine („Službene novine Federacije BiH“, broj _____), Vlada Federacije Bosne i Hercegovine, na _____ sjednici održanoj _____ godine, donosi

U R E D B U

O POSTUPKU FINANSIJSKE KONSOLIDACIJE PRIVREDNIH DRUŠTAVA U FEDERACIJI BOSNE I HERCEGOVINE

I. UVOD

Član 1. (Predmet)

Ovom Uredbom propisuje se postupak izmirenja dugovanja, broj i iznos rata, rokovi plaćanja, iznos umanjenja duga i druga pitanja koja se odnose na finansijsku konsolidaciju privrednih društava sa većinskim učešćem državnog kapitala po osnovu doprinosa za zdravstveno osiguranje, doprinosa za osiguranje od nezaposlenosti i poreza, isključujući porez na dodatnu vrijednost i dugovanja po osnovu isporučene vode, struje, plina, grijanja i ostalih komunalnih usluga, finansijsku konsolidaciju društava sa učešćem državnog kapitala i društava sa 100% učešćem privatnog kapitala po osnovu dugovanja prema zaposlenicima, odnosno po osnovu dugovanja doprinosa za zdravstveno osiguranje, doprinosa za osiguranje od nezaposlenosti i poreza, isključujući porez na dodatnu vrijednost, i dugovanja po osnovu isporučene vode, struje, plina, grijanja i ostalih komunalnih usluga.

Član 2. (Definicije)

Izrazi upotrebljeni u ovoj Uredbi imaju sljedeće značenje:

- a. *Finansijska konsolidacija* – predstavlja niz neophodnih radnji i aktivnosti koje treba preduzeti privredno društvo i pojedinci i institucije definisane Zakonom o finansijskoj konsolidaciji privrednih društava u Federaciji Bosne i Hercegovine;
- b. *Odluka o finansijskoj konsolidaciji društva sa većinskim učešćem ili sa učešćem državnog kapitala*- Odluka koju donosi Vlada Federacije Bosne i Hercegovine, vlada kantona, gradsko ili općinsko vijeće u roku od 30 dana od dana dostavljanja zahtjeva koju podnosi odgovorno lice u privrednom društvu koje se konsoliduje;
- c. *Odluka o finansijskoj konsolidaciji društva sa 100% privatnim kapitalom*- Odluka koju donosi Vlada Federacije Bosne i Hercegovine na prijedlog federalnog ministarstva nadležnog prema pretežnoj djelatnosti privrednog društva sa 100% učešćem privatnog kapitala koje se konsoliduje;
- d. *Društvo sa većinskim učešćem državnog kapitala* - privredno društvo u Federaciji Bosne i Hercegovine u čijem osnovnom kapitalu je državni kapital zastupljen sa više od 50%, i isto vrijedi i za zavisna društava;
- e. *Društvo sa učešćem državnog kapitala* – privredno društvo u Federaciji Bosne

- i Hercegovine u čijem osnovnom kapitalu je državni kapital zastupljen do 50%;
- f. *Društvo sa 100% učešćem privatnog kapitala* - privredno društvo u Federaciji Bosne i Hercegovine u čijem osnovnom kapitalu je privatni kapital zastupljen sa 100%;
- g. *Državni kapital* – kapital privrednog društva čiji je vlasnik Federacija Bosne i Hercegovine, kanton, grad ili općina;
- h. *Porezi*- javni prihodi koji utvrđuje, naplaćuje i kontroliše Porezna uprava Federacije Bosne i Hercegovine, osim poreza na dodatnu vrijednost (PDV)
- i. *Obveznice* – ranije izdati vrijednosni papiri na račun privrednog društva, po osnovu ratnih potraživanja i verifikovane od strane Komisije za konačnu verifikaciju ratnih potraživanja;
- j. *Reprogramiranje dugovanja* – način finansijske konsolidacije dugovanja društva sa većinskim učešćem državnog kapitala, društva sa učešćem državnog kapitala i društva sa 100% učešćem privatnog kapitala za dugovanja po osnovu isporučene vode, električne energije, gasa, grijanja i ostalih komunalnih usluga radi izmirenja dugovanja pod povoljnim uslovima, uključujući odgodu plaćanja i plaćanje dugovanja na rate;
- k. *Nadležni organ vlasti* – organi federalnog, kantonalnog, gradskog i općinskog nivoa vlasti koji vrše ovlaštenja po osnovu učešća državnog kapitala;
- l. *Prethodna saglasnost za reprogramiranje dugovanja*- saglasnost koju društvo prilaže uz zahtjev za finansijsku konsolidaciju, a izdaje je nadležno privredno društvo koje je izvršilo pružanje usluga za isporuku električne energije, vodu, gas i ostale komunalne usluge;
- m. *Prethodna saglasnost zaposlenika*- saglasnost zaposlenika društva sa učešćem državnog kapitala i društva sa 100% učešćem privatnog kapitala kojom zaposlenik potvrđuje da je saglasan da se izmirenje dugovanja prema njemu može izvršiti promjenom strukture osnovnog kapitala društva u njegovu korist, u iznosu jednakom dugovanju društva koje se konsoliduje.
- n. *Sporazum*- sporazum o dogovorenom postupku i načinu izmirenja dugovanja;

Član 3.

(Primjena-poslovanje)

Postupak finansijske konsolidacije primjenjuje se na privredna društva koja su, prema usvojenim zvaničnim godišnjim izvještajima o poslovanju u prethodne tri godine, poslovala sa gubitkom i koja redovno ne izmiruju svoje tekuće finansijske obaveze.

Član 4.

(Primjena-osnova dugovanja)

Finansijska konsolidacija društava, u smislu ove Uredbe, obuhvata dugovanja nastala po osnovu:

- doprinosa za zdravstveno osiguranje,
- doprinosa za osiguranje od nezaposlenosti,
- poreza, isključujući porez na dodatnu vrijednost,
- isporučene vode, električne energije, plina, grijanja i ostalih komunalnih usluga,
- dugovanja prema zaposlenicima za društva sa učešćem državnog kapitala i društva sa 100% učešćem privatnog kapitala;

Član 5.
(Primjena- rokovi)

Postupak finansijske konsolidacije društva sa većinskim učešćem državnog kapitala, društva sa učešćem državnog kapitala i društva sa 100% učešćem privatnog kapitala ne može trajati duže od tri godine.

II. POSTUPAK FINANSIJSKE KONSOLIDACIJE DRUŠTVA SA VEĆINSKIM UČEŠĆEM DRŽAVNOG KAPITALA

Član 6.
(Mogućnosti izmirenja dugovanja po osnovu doprinosa za zdravstveno osiguranje)

Privredno društvo koje je pribavilo Odluku o finansijskoj konsolidaciji izdatu od Vlade Federacije Bosne i Hercegovine, Vlade kantona, gradskog ili općinskog vijeća, u zavisnosti od toga u čijoj je nadležnosti i Zavod zdravstvenog osiguranja prema kojem postoji dugovanje će u skladu sa ovom Uredbom pristupiti regulisanju međusobnih dužničko povjerilačkih odnosa, na način da će:

- Usaglasiti tačan iznos dugovanja zaključno sa 30.09.2013. godine, pri čemu će se kamate otpisati;
- Postići dogovor o načinu otplate duga:
 - ranije izdatim obveznicama po osnovu ratnih potraživanja koje su izdate na račun privrednog društva, a čiji je emitent Vlada Federacije Bosne i Hercegovine, koje su utvrđene rješenjem o verifikaciji ratnih potraživanja;
 - na teret kapitala privrednog društva koje se konsoliduje;
 - ili kombinacijom dva gore navedena načina.

O dogovorenom postupku i načinu izmirenja dugovanja, društvo i Zavod za zdravstveno osiguranje zaključuju Sporazum i odmah pristupaju njegovoj realizaciji, na način da privredno društvo odmah, bez odlaganja i u skladu sa važećim zakonskim propisima, pokreće aktivnosti i procese, koji su neophodni za realizaciju dogovorenog načina izmirenja dugovanja.

Društvo se obavezuje da u roku od jedne godine završi sve potrebne aktivnosti i procese kako bi se pristupilo otplati dugovanja na način utvrđen Sporazumom.

Ukoliko u roku od jedne godine, od dana potpisivanja Sporazuma, Društvo ne završi neophodne procese, Zavod zdravstvenog osiguranja pismeno obavještava nadležni organ vlasti (član 2 tačka k) koja je donijela Odluku o finansijskoj konsolidaciji društva o istom.

Po prijemu pismene obavijesti nadležni organ vlasti (član 2 tačka k) pokreće aktivnosti da se Odluka o konsolidaciji stavi van snage.

Član 7.

(Izmirenje duga po osnovu doprinosa za zdravstveno osiguranje ranije izdatim obveznicama po osnovu ratnih potraživanja)

Ukoliko se izmirenje duga po osnovu doprinosa za zdravstveno osiguranje vrši ranije izdatim obveznicama po osnovu ratnih potraživanja, to podrazumijeva da vrijednost utvrđena rješenjem o verifikaciji ratnih potraživanja može izmiriti dug u omjeru 1:1.

Član 8.

(Izmirenje duga po osnovu doprinosa za zdravstveno osiguranje na teret kapitala privrednog društva koje se konsoliduje)

Ukoliko se izmirenje duga po osnovu doprinosa za zdravstveno osiguranje vrši na teret kapitala privrednog društva koje se konsoliduje, tada se ukupni kapital privrednog društva koje se konsoliduje povećava za usaglašeni dugovani iznos, a dalja procedura verifikacije dionica ili udjela vrši se u skladu sa važećim zakonima i drugom regulativom.

Na osnovu zaključenog Sporazuma i odluke skupštine društva kojom se povećava kapital za usaglašeni dugovani iznos, Komisija za vrijednosne papire otpočinje proceduru verifikacije dionica ili udjela.

Nakon obračuna i određivanja procentualnog udjela vrijednosti duga u strukturi kapitala društva, za isti dolazi do promjene strukture kapitala društva.

Član 9.

(Mogućnosti izmirenja dugovanja po osnovu doprinosa za osiguranje od nezaposlenosti i po osnovu poreza, osim poreza na dodatnu vrijednost)

Privredno društvo koje je pribavilo Odluku o finansijskoj konsolidaciji izdatu od Vlade Federacije Bosne i Hercegovine, Vlade kantona, gradskog ili općinskog vijeća, u zavisnosti od toga u čijoj je nadležnosti i Porezna uprava Federacije Bosne i Hercegovine prema kojoj postoji dugovanje će u skladu sa ovom Uredbom pristupiti regulisanju međusobnih dužničko povjerilačkih odnosa, na način da će:

- Usaglasiti tačan iznos dugovanja zaključno sa 30.09.2013. godine, pri čemu će se kamate otpisati;
- Postići dogovor o načinu otplate duga:
 - ranije izdatim obveznicama po osnovu ratnih potraživanja koje su izdate na račun privrednog društva, a čiji je emitent Vlada Federacije Bosne i Hercegovine, koje su utvrđene rješenjem o verifikaciji ratnih potraživanja;
 - na teret kapitala privrednog društva koje se konsoliduje;
 - ili kombinacijom dva gore navedena načina.

O dogovorenom postupku i načinu izmirenja dugovanja, društvo i Porezna uprava Federacije Bosne i Hercegovine zaključuju Sporazum i odmah pristupaju njegovoj provedbi, na način da privredno društvo odmah, bez odlaganja i u skladu sa važećim zakonskim propisima, pokreće aktivnosti i procese, koji su neophodni za realizaciju dogovorenog načina izmirenja dugovanja .

Društvo se obavezuje da u roku od jedne godine završi sve potrebne aktivnosti i procese kako bi se pristupilo otplati dugovanja na način kako je definirano Sporazumom.

Ukoliko u roku od jedne godine, od dana potpisivanja Sporazuma, Društvo ne završi neophodne procese, Porezna uprava Federacije Bosne i Hercegovine pismeno obavještava nadležnu instituciju koja je donijela Odluku o finansijskoj konsolidaciji društva o istom.

Po prijemu pismene obavijesti nadležna institucija pokreće aktivnosti da se Odluka o konsolidaciji stavi van snage.

Član 10.

(Izmirenja dugovanja po osnovu doprinosa za osiguranje od nezaposlenosti i po osnovu poreza, osim poreza na dodatnu vrijednost ranije izdatim obveznicama po osnovu ratnih potraživanja)

Ukoliko se izmirenje duga po osnovu doprinosa za osiguranje od nezaposlenosti i po osnovu poreza, osim poreza na dodatnu vrijednost vrši ranije izdatim obveznicama po osnovu ratnih potraživanja, to podrazumijeva da vrijednost utvrđena rješenjem o verifikaciji ratnih potraživanja izmiruje poreski dug, bez kamata, u omjeru 1:1

Član 11.

(Izmirenje duga po osnovu doprinosa za osiguranje od nezaposlenosti i po osnovu poreza, osim poreza na dodatnu vrijednost na teret kapitala privrednog društva koje se konsoliduje)

Ukoliko se izmirenje duga po osnovu doprinosa za zdravstveno osiguranje vrši na teret kapitala privrednog društva koje se konsoliduje, tada se ukupni kapital privrednog društva koje se konsoliduje povećava za usaglašeni dugovani iznos, a dalja procedura verifikacije dionica ili udjela vrši se u skladu sa važećim zakonima i drugom regulativom.

Na osnovu zaključenog Sporazuma i odluke skupštine društva kojom se povećava kapital za usuglašeni dugovani iznos, Komisija za vrijednosne papire otpočinje proceduru verifikacije dionica ili udjela.

Član 12.

(Dugovanja po osnovu isporučene vode, električne energije, gasa, grijanja i ostalih komunalnih usluga)

Dugovanja privrednih društava sa većinskim učešćem državnog kapitala prema privrednim društvima koja su izvršila pružanje usluga isporuke vode, električne energije, gasa, grijanja i ostalih komunalnih usluga izmiruju se reprogramiranjem dugovanja radi izmirenja pod povoljnim uslovima, uključujući odgodu plaćanja i plaćanje dugovanja na rate, pri čemu se izmiruje glavni dug, a kamate se otpisuju.

Član 13.

(Postupak izmirenja dugovanja po osnovu isporučene vode, struje, plina, grijanja i ostalih komunalnih usluga reprogramiranjem dugovanja)

Društvo u većinski državnom vlasništvu i društvo koje je izvršilo pružanje usluga za koje postoje dugovanja će u skladu sa ovom Uredbom pristupiti regulisanju međusobnih dužničko povjerilačkih odnosa, na način da će se postići dogovor o reprogramiranju dugovanja, i to:

- Usaglasiti tačan iznos duga do 30.09.2013. godine sa davaocem usluge za koju postoji dugovanje i od istog dobiti prethodnu saglasnost, na način da se obračuna iznos glavnog duga, bez kamata;
- Po usaglašavanju tačnog iznosa duga sa svakim davaocem usluga pojedinačno, društvo predlaže davaocu usluge reprogram dugovanja, koji sadrži odgodu plaćanja, broj rata i iznos rate za otplatu duga, s tim da broj rata ne može biti veći od 36 mjesečnih rata;
- Po dostavljenom prijedlogu reprograma dugovanja od strane dužnika, davalac usluge kojem se duguje daje svoje mišljenje, te se postiže dogovor o reprogramu duga, i potpisuje Sporazum o reprogramu duga. Prilikom dogovaranja o reprogramu duga, odnosno definisanja odgode plaćanja, broja mjesečnih rata i visine rate potrebno je da i jedna i druga strana realno sagledaju stvarne mogućnosti dužnika vezane za iznos duga koji je potrebno mjesečno otplaćivati, vodeći računa i o plaćanju tekućih obaveza, s tim da broj mjesečnih rata, uključujući i odgodu plaćanja, ne može biti veći od 36;
- U slučaju da privredno društvo sa većinskim državnim vlasništvom ne započne da ispunjava obaveze iz Sporazuma o reprogramu duga u roku od 60 dana, davalac usluga, potpisnik Sporazuma pismeno obavještava nadležnu instituciju koja je donijela odluku o finansijskoj konsolidaciji društva;
- Po prijemu pismene obavijesti od davaoca usluga da privredno društvo sa većinskim državnim vlasništvom nije u roku 60 dana započeo da ispunjava obaveze iz Sporazuma o reprogramu, nadležna institucija koja je donijela odluku o finansijskoj konsolidaciji društva, iste provjerava i nakon toga pokreće aktivnosti da se Odluka o konsolidaciji stavi van snage.

III. POSTUPAK FINANSIJSKE KONSOLIDACIJE DRUŠTVA SA UČEŠĆEM DRŽAVNOG KAPITALA ILI DRUŠTVA SA 100% UČEŠĆEM PRIVATNOG KAPITALA

Član 14.

(Dugovanja prema zaposlenicima)

Dugovanja privrednih društava sa učešćem državnog kapitala i privrednih društava sa 100% učešćem privatnog kapitala prema zaposlenicima izmiruju se na način da se poveća ukupna struktura osnovnog kapitala društva za iznos dugovanja, a u korist zaposlenika (sadašnjih i bivših) društva koje se konsoliduje, ukoliko je društvo pribavilo prethodnu saglasnost zaposlenika.

Član 15.

(Postupak izmirenja dugovanja prema zaposlenicima)

Privredno društvo sa učešćem državnog kapitala i društvo sa 100% učešća privatnog kapitala će, nakon što je dobilo Odluku o finansijskoj konsolidaciji izdatu od Vlade Federacije Bosne i Hercegovine, Vlade kantona, gradskog ili općinskog vijeća, u zavisnosti od toga u čijoj je nadležnosti, odnosno od nadležnog federalnog ministarstva, pristupiti izmirenju dugovanja prema zaposlenicima na način da:

- privredno društvo će sa svakim zaposlenikom pojedinačno kojem se duguje usaglasiti tačan iznos duga do 30.09.2013. godine;
- Po usaglašavanju tačnog iznosa duga, svakom zaposleniku pojedinačno prezentirati buduću promjenu strukture osnovnog kapitala u njegovu korist. Ta promjena treba predstavljati ekvivalent iznosu dugovanja društva koje se konsoliduje prema zaposleniku;
- Sa svakim zaposlenikom pojedinačno potpisuje se Sporazum u kojem se navodi tačan iznos duga, odnosno pretpostavljeni procentualni udio zaposlenika u strukturi kapitala, koji predstavlja ekvivalent dugu prema zaposleniku;
- Na osnovu Sporazuma društvo odmah pokreće aktivnosti vezane za promjenu osnovne strukture kapitala kod nadležne institucije;
- Ukoliko u roku od 60 dana zaposlenik ne dobije dokaz da su u toku aktivnosti o promjeni strukture kapitala kod nadležnih institucija, zaposlenik pismenim putem obavještava nadležnu instituciju koja je donijela Odluku o konsolidaciji;
- Po prijemu pismene obavijesti zaposlenika da društvo 60 dana ne ispunjava obaveze iz Sporazuma, nadležna institucija koja je donijela odluku o finansijskoj konsolidaciji društva, obavijest provjerava, a nakon toga pokreće aktivnosti da se Odluka o konsolidaciji stavi van snage.

Ukoliko se ne postigne Sporazum sa određenim brojem uposlenika sadašnjih ili bivših iz bilo kojeg razloga, konsolidacija se može nastaviti ako je potpisan Sporazum sa uposlenicima sadašnjim ili bivšim čija ukupna visina prelazi 85% ukupnih dugovanja.

Zaposlenici sa kojima nije postignut Sporazum, izmirenje svojih potraživanja mogu zatražiti na drugačiji način.

Član 16.

(Dugovanja po osnovu doprinosa za zdravstveno osiguranje)

Na postupak izmirenja dugovanja privrednih društava sa učešćem državnog kapitala i društava sa 100% učešća privatnog kapitala po osnovu doprinosa za zdravstveno osiguranje shodno se primjenjuju članovi 6., 7. i 8. ove Uredbe.

Član 17.

(Dugovanja po osnovu doprinosa za osiguranje od nezaposlenosti i poreza, isključujući poreze na dodatnu vrijednost)

Na postupak izmirenja dugovanja privrednih društava sa učešćem državnog kapitala i društava sa 100% učešća privatnog kapitala po osnovu doprinosa za osiguranje od nezaposlenosti i poreza, isključujući poreze na dodatnu vrijednost shodno se primjenjuju članovi 9., 10. i 11. ove Uredbe.

Član 18.
(Dugovanja po osnovu isporučene vode, električne energije,
plina, grijanja i ostalih komunalnih usluga)

Na postupak izmirenja dugovanja privrednih društava sa učešćem državnog kapitala i društava sa 100% učešća privatnog kapitala po osnovu dugovanja po osnovu isporučene vode, struje, plina, grijanja i ostalih komunalnih usluga shodno se primjenjuju članovi 12. i 13. ove Uredbe.

Član 19.
(Nadzor)

Nadzor nad provođenjem ove Uredbe vrše resorna federalna ministarstva, svako u okviru svojih nadležnosti.

Član 20.

Ova Uredba stupa na snagu osmog dana od dana objavljivanja u „Službenim novinama Federacije Bosne i Hercegovine“.

V.broj: _____/2014

_____2014.godine
Sarajevo

P R E M I J E R

Nermin Nikšić

OBRAZLOŽENJE
UZ UREDBU O POSTUPKU FINANSIJSKE KONSOLIDACIJE PRIVREDNIH DRUŠTAVA
U FEDERACIJI BOSNE I HERCEGOVINE

I – USTAVNOPRAVNI I ZAKONSKI OSNOV

Ustavni osnov za donošenje ove Uredbe sadržan je u odredbama člana III. 1. b.) i d.) koje su izmjenjene amandmanima VIII, LXXXIX i CVI Ustava Federacije Bosne i Hercegovine prema kojoj je u isključivoj nadležnosti Federacije Bosne i Hercegovine utvrđivanje ekonomske politike, uključujući planiranje i obnovu, te politiku korištenja zemljišta na federalnom nivou, odnosno donošenje propisa o finansijama i finansijskim institucijama Federacije i fiskalna politika Federacije.

Zakonski osnov za donošenje ove Uredbe sadržan je u članu 18. Zakona o finansijskoj konsolidaciji privrednih društava u Federaciji Bosne i Hercegovine („Službene novine Federacije BiH“, broj: **xx/14**) u kojem je utvrđeno da će se postupak izmirenja dugovanja, broj i iznos rata, rokovi plaćanja, iznos umanjenja duga i druga pitanja koja se odnose na finansijsku konsolidaciju urediti propisom Vlade Federacije BiH.

II – RAZLOZI ZA DONOŠENJE UREDBE

Veći broj privrednih društava u čijoj strukturi osnovnog kapitala u većem ili manjem dijelu učestvuje državni kapital, kao i privrednih društava sa 100% učešćem privatnog kapitala suočavaju se sa nizom problema od kojih je najizraženiji održavanje likvidnosti u poslovanju.

Finansijskom konsolidacijom privrednih društava bili bi stvoreni preduslovi za učestvanje u postupku javnog nadmetanja putem tendera za obavljanje radova i usluga na tržištu, realizaciju kreditnih sredstava, rješavanje problema dugovanja po osnovu neplaćenih doprinosa za veći broj radnika kojima nisu uplaćeni doprinosi, otklanjanje opasnosti od pokretanja stečajnog ili likvidacionog postupka i slično.

Ovom Uredbom propisuje se postupak izmirenja dugovanja, broj i iznos rata, rokovi plaćanja, iznos umanjenja duga i druga pitanja koja se odnose na finansijsku konsolidaciju privrednih društava sa većinskim učešćem državnog kapitala po osnovu doprinosa za zdravstveno osiguranje, doprinosa za osiguranje od nezaposlenosti i poreza, isključujući porez na dodatnu vrijednost i dugovanja po osnovu isporučene vode, struje, plina, grijanja i ostalih komunalnih usluga, finansijsku konsolidaciju društava sa učešćem državnog kapitala i društava sa 100% učešćem privatnog kapitala po osnovu dugovanja prema zaposlenicima, odnosno po osnovu dugovanja doprinosa za zdravstveno osiguranje, doprinosa za osiguranje od nezaposlenosti i poreza, isključujući porez na dodatnu vrijednost, i dugovanja po osnovu isporučene vode, struje, plina, grijanja i ostalih komunalnih usluga.

Tačan iznos dugovanja se obračunava zaključno sa 30.09.2013. godine, pri čemu će se kamate otpisati.

Poglavlje II se odnosi na postupak finansijske konsolidacije društava sa većinskim učešćem državnog kapitala za dugovanja po osnovu doprinosa za zdravstveno osiguranje, doprinosa za osiguranje od nezaposlenosti i poreza, isključujući porez na dodatnu vrijednost i dugovanja po osnovu isporučene vode, struje, plina, grijanja i ostalih komunalnih usluga, nakon što je društvo sa većinskim državnim vlasništvom dobilo Odluku o finansijskoj konsolidaciji izdatu od Vlade Federacije Bosne i Hercegovine, Vlade kantona, gradskog ili općinskog vijeća, u zavisnosti od toga u čijoj je nadležnosti .

Uredbom je propisano da društvo sa većinskim državnim vlasništvom, za izmirenje dugovanja po osnovu doprinosa za zdravstveno osiguranje, postigne dogovor i zaključuje Sporazum o postupku i načinu izmirenju duga sa Zavodom zdravstvenog osiguranja, pri čemu se otplata duga može izvršiti ranije izdatim obveznicama po osnovu ratnih potraživanja koje su izdate na račun privrednog društva, a čiji je emitent Vlada Federacije Bosne i Hercegovine, koje su utvrđene rješenjem o verifikaciji ratnih potraživanja, zatim na teret kapitala privrednog društva koje se konsoliduje, ili kombinacijom ova dva načina.

Na isti način je propisano da se može izmiriti dug po osnovu doprinosa za osiguranje od nezaposlenosti i poreza, isključujući porez na dodatnu vrijednost, s tim da se Sporazum o postupku i načinu izmirenju duga zaključuje sa Poreznom upravom Federacije BiH.

Za izmirenje dugovanja po osnovu isporučene vode, struje, plina, grijanja i ostalih komunalnih usluga društvo sa većinskim državnim vlasništvom potpisuje Sporazum o reprogramu dugovanja sa privrednim društvom koje je izvršilo pružanje usluga za koje postoji dugovanje i u njemu se precizira odgoda plaćanja, broj rata i iznos rate za otplatu duga, s tim da broj rata ne može biti veći od 36 mjesečnih rata.

Poglavlje III se odnosi na postupak finansijske konsolidacije društava sa učešćem državnog kapitala i društva sa 100% učešćem privatnog kapitala za dugovanje prema zaposlenicima, kao i dugovanja po osnovu doprinosa za zdravstveno osiguranje, doprinosa za osiguranje od nezaposlenosti i poreza, isključujući porez na dodatnu vrijednost i dugovanja po osnovu isporučene vode, struje, plina, grijanja i ostalih komunalnih usluga, nakon što je društvo sa većinskim državnim vlasništvom dobilo Odluku o finansijskoj konsolidaciji izdatu od Vlade Federacije Bosne i Hercegovine, Vlade kantona, gradskog ili općinskog vijeća, u zavisnosti od toga u čijoj je nadležnosti, odnosno nadležnog federalnog ministarstva.

U ovom poglavlju je propisano da društvo sa učešćem državnog kapitala i društvo sa 100% učešćem privatnog kapitala izmiruje dug prema zaposlenicima na način da će privredno društvo sa svakim zaposlenikom pojedinačno kojem se duguje usaglasiti tačan iznos duga do 30.09.2013. godine, i zaključiti Sporazum u kojem se navodi tačan iznos duga, odnosno pretpostavljeni procentualni udio zaposlenika u strukturi kapitala, koji predstavlja ekvivalent dugu prema zaposleniku.

Propisano je također, da ukoliko se ne postigne Sporazum sa određenim brojem uposlenika sadašnjih ili bivših iz bilo kojeg razloga, konsolidacija se može nastaviti ako je potpisan Sporazum sa uposlenicima sadašnjim ili bivšim čija ukupna visina prelazi 85% ukupnih dugovanja, a zaposlenici sa kojima nije postignut Sporazum, izmirenje svojih potraživanja mogu zatražiti na drugačiji način.

Postupak izmirenja dugovanja privrednih društava sa učešćem državnog kapitala i društava sa 100% učešća privatnog kapitala po osnovu doprinosa za zdravstveno osiguranje, doprinosa za osiguranje od nezaposlenosti i poreza,

isključujući porez na dodatnu vrijednost i dugovanja po osnovu isporučene vode, struje, plina, grijanja i ostalih komunalnih usluga po osnovu doprinosa za osiguranje od nezaposlenosti i poreza, isključujući poreze na dodatnu vrijednost vrši se na isti način propisan u poglavlju II.

Nadzor nad provođenjem ove Uredbe vrše resorna federalna ministarstva, svako u okviru svojih nadležnosti.

Radna 01072014